

宋史新編卷九十七

列傳四十五

明南京戶部主事

晏殊

龐籍

王隨

章得象

呂夷簡

字公純

張士遜

晏殊字同叔臨川人七歲能屬文景德初以神童召與進士千餘人並試廷中神氣不懾援筆立成真宗嘉賞賜同進士出身宰相寇準曰殊江外人帝顧曰張九齡非江外人邪後二日復試帝數稱善擢祕書省正字祕閣讀書明年試中書遷秩東封恩遷為集賢校理喪父歸奪服起之後祀太清宮詔修寶訓同判太常禮院喪

母求終服不許歷遷知制誥判集賢院久之爲翰林學士遷左庶子帝每訪以事率用方寸小紙細書已答奏輒并藁封上帝重其慎密仁宗初立章獻太后權聽政丁謂曹利用各欲獨見奏事殊建言羣臣奏事者垂簾聽之皆母得見議遂定屢進禮部侍郎拜樞密副使疏論張耆忤太后旨坐從幸玉清昭應宮從者持笏後至以笏撞之折齒御史彈奏罷知宣州歷拜參知政事加尚書左丞太后崩以禮部尚書罷知亳州徙陳州遷刑部尚書以本官兼御史中丞復爲三司使陝西用兵殊益內臣監軍不以陣圖授諸將使得應敵爲攻守及

弓箭手教閱備戰鬪又請出諸中長物助邊費凡修
領財利者還度支皆施行康定初自樞使進中書慶
曆中拜集賢殿學士同平章事兼樞密使殊雅好獎掖
名士如范仲淹孔道輔皆出其門及爲相益務進賢材
而仲淹與韓琦富弼皆進用至於臺閣多一時之賢帝
亦奮然有意欲因羣材以更治而小人權倖皆不便殊
出歐陽修爲河北都轉運諫官奏留不許孫甫蔡襄上
言宸妃生聖躬而殊誌妃墓沒而不言又奏殊役官兵
治餽舍以規利降工部尚書知潁州然殊以章獻方臨
朝故誌不敢斥言所役兵乃輔臣例宣惜者非殊罪也

歷觀文殿大學士知永興軍徙河南遷兵部尚書以疾
請歸京師訪醫藥既愈求出守留侍經筵卒年六十五
贈司空兼侍中謚元獻篆其碑曰舊學之碑殊性剛簡
清儉累典州吏民畏其愾急善知人富弼楊察皆其壻
也殊爲宰相兼樞密使而弼爲副使辭所兼不允其信
遇如此文章瞻麗尤工詩晚歲益篤學文集二百四十
卷及刪次梁陳以後名臣述作爲集選一百卷

龐籍字醇之武成人進士及第歷官殿中侍御史章獻
遣詰以楊太妃爲太后議軍國事籍請於仁宗下閣問
事垂簾儀制盡燔之又奏用人宜辨邪正防朋黨擢進

近列願採公論毋令出於執政并道輔謂人曰言事多觀望宰相意獨龐醇之天子御史也爲開封府判官尚美人遣內侍稱教旨免工人市租籍言於上爲下詔戒飭籍又數劾范諷罪諷善李迪寢不報反坐言宮禁事不實以祠部員外郎罷爲廣南東路轉運使又言范諷事有不盡如奏諷坐貶籍亦降知臨江軍尋復官徙福建轉運使擢侍御史改刑部員外郎知雜事判大理寺進天章閣待制元昊反爲陝西體量安撫使坐令吏馮士元市女曰降知汝州徙同州就除陝西都轉運使受詔同按黃德和獄建言宿兵西鄙將士弗獲功賞而

內官醫官樂官坐享豐賜天下指目謂之三官願少裁
損專勵戰功寇不足平也進龍圖閣直學士知延州俄
兼鄜延都總管經略安撫緣邊招討使逾年改延州觀
察使力辭換左諫議大夫自元昊陷金明諸砦破五龍
川邊民焚掠殆盡籍至稍葺治之使部將狄青等悉復
所亡地元昊遣李文貴齎野利旺榮書來送款籍曰此
詐也乃屯兵青澗城後數月果大寇定川籍召文貴開
諭之遣去旣而元昊又以旺榮書來會帝厭兵因招懷
之遣籍報書使呼旺榮爲太尉籍曰太尉三公非陪臣
所稱爾使旺榮當之則元昊不得臣矣今其書自稱寧

本或誤寧令皆其官名於義無嫌從之會敵新破涇州
城砦方議修復使者往返踰年又遣賀從勛來籍遠關
下因陳便宜言羌久不通和市國人愁怨今辭理憲順
必有改事中國之心請遣使申諭之朝廷采用其策元
昊既以連擢籍至樞密使遷戶部侍郎拜同中書門下
平章事昭文館大學士監修國史蓋殊拜也儂智高反
師數不利遣狄青爲宣撫使諫官韓絳謂武人不宜專
任帝以問籍籍曰若以文臣副之則號令不專不如不
遣帝以爲然旣而捷書至帝喜曰青破賊卿之力也遂
欲以青爲樞密使同平章事籍力爭之不聽堂吏受賂

韓絳論罷知鄆州居數月加觀文殿大學士拜昭德軍
節度使知永興軍改并州仁宗不豫籍密疏請擇立宗
室其言甚切坐州將武戡等爲夏人所敗復爲觀文殿
大學士戶部侍郎知青州遷尚書左丞不拜徙定州召
還上章告老尋以太子太保致仕封賴國公卒年七十
六贈司空加侍中謚莊敏籍曉律令長吏事持法深峭
軍中有犯或斷斬剜磔以故士卒畏服治民頗有惠愛
及爲相聲望減於治郡時子元英朝散大夫孫恭孫
恭孫字德孺以蔭補通判施州崇寧中部蠻向文彊跋
扈恭孫使王遠領州事致討恭孫說降文彊而斬之以

功進三秩知涪州遂以開邊爲已任褒遷至徽猷閣待
制進直學士知成都府言者論其貪縱謫保靜軍節度
副使才踰月起知陳州復待制帥瀘州又以築思州進
學士前後在西南二十年所得州縣多張名簿實瘠鹵
不毛地繕治轉餉爲蜀人病未幾皆廢

王隨字子正河南人進士甲科歷遷刑部員外郎兼侍
御史知雜事擢知制誥以不善制辭出知應天府與宗
謂其治太寬改知揚州再加右諫議大夫權知開封府
仁宗爲太子拜右庶子仍領府事周懷政誅隨自陳嘗
懷政白金五十兩奪知制誥改給事中知杭州歷復

給事中爲龍圖閣直學士知秦州坐事徙河南府累遷
戶部侍郎參知政事請與同列日獻前代名臣規諫一
事議者謂非輔弼職事遂寢景祐末自知樞密院事拜
門下侍郎同中書門下平章事昭文館大學士監修國
史自薛居正後初相無越遷門下侍郎者學士丁度之
失也爲相一年無建明陳堯佐韓億石中立與同執政
數爭事會災異屢發諫官韓琦言之罷隨以彰信軍節
度使同中書門下平章事判河陽卒贈中書令謚章惠
後改文惠隨外若方嚴而治實尚寬晚更卜急輒娛
人性喜佛慕裴休爲人然風跡弗逮云

蘇軾字希言浦城人母方娠夢神人授以玉像及生
父與復夢其庭積笏如山長好學姿表莊重進士及第
官州縣楊億以其深厚舍宏有公輔器薦之歷知制誥
翰林學士累遷戶部侍郎同知樞密事遂拜同中書門
下平章事集賢殿大學士仁宗謂曰向太后臨朝卿清
忠無所附且未嘗有干請故今用卿慶曆二年陝西用
兵兼樞密使未幾以工部尚書爲昭文館大學士五年
拜鎮安軍節度使同平章事封郇國公徙判河南府守
司空致仕卒帝親臨奠蓋致仕者特恩也贈太尉兼侍
中謚文憲後改謚文簡得象在翰林十二年章獻時宦

官方熾必正色待之或不交一言在中書八年宗戚一切抑而不進仁宗銳意天下事進用韓琦范仲淹富弼使同得象經畫得象無所建明御史孫抗數言之初閤人謠曰南臺江合出宰相至得象相時沙湧可涉云論曰龐籍王隨二人者寬嚴不同皆宜於治郡及爲宰相乃弗滿人意豈漢黃次公之儔歟晏殊喜薦拔時賢韋得象渾厚有容竝號長者慶曆朝多君子治體寬裕茲豈無助哉

呂夷簡字坦夫壽州人進士及第補絳州軍事推官歷刑部員外郎兼侍御史知雜事按執送蜀賊李順

是左右業已稱賀趣其獄夷簡卒以實奏判永興寇準
黥罪人徙湖南道由京師上準變事夷簡曰準治下急
是欲中傷爾宜勿問益徙遠方從之歷知制誥進龍圖
閣直學士再遷刑部郎中權知開封府嚴辦有聲帝識
姓名于屏將大用之仁宗卽位以給事中參知政事累
進吏部侍郎同中書門下平章事昭文館大學士又加
中書侍郎帝所生母宸妃薨宮中未治喪夷簡朝奏事
因曰聞有宮嬪亡者太后瞿然曰宰相亦預宮中事邪
引帝起有頃獨出曰卿何問我母子也夷簡曰太后他
日不欲全劉氏乎太后意稍解有司希太后旨言歲月

葬未利夷簡請發哀成服備儀仗葬之大內火百官晨朝而宮門不開輔臣請對帝御拱辰門夷簡獨不拜帝使人問故曰宮庭有變羣臣願一望清光帝舉廉見之乃拜詔爲修大內使內成進尚書右僕射兼門下侍郎辭僕射乃兼吏部尚書太后崩帝始親政夷簡疏陳八事曰正朝綱塞邪徑禁貨賄辨佞壬絕女謁踈近習罷力役節冗費四方奏獄帝問何以裁之夷簡贊從輕典帝與夷簡謀以太后所任張耆夏竦皆罷之退告郭皇后后曰夷簡獨不附太后邪但多機巧善應變耳由是夷簡亦罷爲武勝軍節度使檢校太傅同平章事判陳

解歲中而夷簡復相郭后批尚美人頰誤傷帝頸帝以爪痕示執政夷簡以前罷相故遂主廢后仁宗疑之夷簡曰光武漢明主也郭后以怨懟坐廢况傷陛下頸乎夷簡先敕有司無得受臺諫章奏於是御史中丞孔道輔右司諫范仲淹率臺諫詣閤門請對有旨令臺諫詣中書夷簡乃貶道輔等后遂廢加右僕射封申國公王曾與夷簡數爭事不平曾斥夷簡納賂市恩夷簡乞置對帝問曾曾語蘊於是二人皆罷夷簡以鎮安軍節度使同平章事判許州徙美雄軍未幾以右僕射復入相慶曆初徙許國公時方飭兵備改兼樞密使契丹聚兵

幽薊聲言將入寇議者請城洛陽夷簡謂契丹侮怯亡
以示威景德之役非乘輿濟河其心未易服也宜建都
大名示將親征以伐其謀此子囊城郢計也使契丹得
渡河雖高城深池何可恃耶乃建北京夷簡感風眩拜
司空平章軍國重事力辭復降手詔曰古謂髭可療疾
今翦以賜卿及授司徒監修國史同議軍國重事固請
老以太尉致仕卒年六十六帝涕下曰安得憂國忘身
如夷簡者贈太師中書令謚文靖久之書懷忠之碑賜
之自帝立太后臨朝十餘年天下晏然夷簡之力爲多
後元昊反四方久不用兵師出數敗契丹乘之求關南

地頗賴其計畫二邊以寧然建募萬勝軍雜市井小人
浮脆不任戰鬪用宗室補環衛官驟增奉賜又加遺契
丹歲緡金二十萬當時不深計之其後費大而不可止
孔道輔等諫廢后夷簡謂伏閣非太平事范仲淹屢言
事獻百官圖夷簡指爲狂肆時論以此少之數爲言者
所詆帝眷倚不衰然所斥士旋復收用亦不終廢其於
天下事屈伸舒卷動有操術爲世名相後配食仁宗廟
有集二十卷子公綽公弼公著公孺公著自有傳

公綽字仲祐蔭歷兵部員外郎史館修撰後同判太常
寺兼提舉修祭器公綽以制度多違禮請悉更造故事